



partii naleraq

Nuuk 9. oktober 2018  
UKA2018/205  
Hans Enoksen Partii Naleraq

**Ilageeqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq**  
(Ilinniartitaanermut, Kultureqarnermut, Ilageeqarnermut, Nunanut Allanullu Naalakkersuisoq)

**Siullermeernera**

Ilageeqarneq pillugu inatsisartut inatsisaannik allanngortitsinissaq pillugu siunnersuummut matumunna oqaaseqaammik saqqummiussaqaassaagut.

Oqaluffiit nunatsinni ulluinnarni inuunermut annertuumik sunniuteqarput ulluni nuannaarfinni, ulluni artornartuni aliasuffinni tamani tarnikkut anersaakkullu nukittorsarfigisaratsigit sulilu siunissami taamaattuartaussaalluni.

Ukiuni makkunani ilageqarnikkut kiffartuussinerit nunatsinni ajoraluartumik kinguariartortutut oqaatigissagaanni uniorpallaarunangilaq.

Tassani pineqarput nunaqarfinni, illoqarfinnilu malunnartumik, ilagiinni sullissinerit qangamut naleqqiullugit soqutiginninnerit kiffartuussinerillu ilagiinni appariarsimanera appariartuinnarneralu malunnarsiartuinnarmat, pingaartumik nunaqarfiit illoqarfiillu isorliunerusut eqqarsaatigalugit, soorunami tamanna assut ilungersunarpoq pingaartumik ukiuni makkunani inuiaqatigiinni susassareqatigiinnerup malunnartumik appariartuinnarfiani.

Ajoqinngornianik pattattunngornianillu ilinniartitsinerup aalajangersaasarnissamik biskoppip piginnaatinneqarnissaanik saqqummiussaqaarneq pissusissamisoortutut isigaarput, tassami taamaliornikkut aamma sukkanerusumik ajoqinik pattussanillu ilinniartitsinerit anguneqarsinnaaniassammata, aammalu taamatut ilinniartitsiniarnermi pissutsit ilisimalluaraanni sukaanerusumik aaqqinniarsinnaaneq anguneqarsinnaammat.

Oqaluffinnut pulaarnermi takornarissat allallu oqaluffiup ammasarnerisa nalaani akiliisitsisarnissaq inatsimmi anguniarneqartoq uagut kalaallit eqqarsartaatsitsinnut naleqquppallaanngikkaluartoq oqaluffimmut pulaarluni akiliisitsinissamik taamatut ikkussinissaq akuersaarsinnaavarput. Sumiiffimmilu ilagiit sinniisaassa akiliutit sumut atorneqartassanersut aammalu aningaasartuutitut sunut atorneqartassanersut naamminneq aalajagertassappassuk akerlerinngilarput.

Ukiuni makkunani ilageqarnikkut atugassarititaasut ilagiinni sulisunut ilungersunarsiartuinnartut naammattoortarpagut, soorlu ajoqissaaleqinerit, pattattussaaleqinerit, palasissaaleqinerit, ilagiit sinnissaannut ilasortassaaleqinerit, tamakkulu qaangerniarneqassappata qularnangilaq taamatut ingerlaaseqalernermut suut pissutaanersut qulajaqqissaartariaqalerput, tassami illoqarfinni anginerusuniluunniit ulluinnarni tamakku naammattoorneqartalermeta.

Oqaluffiit aserfallakkiartuinnartut, palasit illui nutaanngitsorujussuanngorlutik ilaatigut oqummik pissuteqartumik najorneqarsinnaajunnarsimasut, soorunami aamma tamakku pissuteqarput ilagiinni sulisuuniartunut ajornartorsiortitsimmata. Taamatummi inissisimasut ilisimagaluarlugit aningaasaliissutit malinnaatinneqanngimmata, tassami kina sulumassammat pitsaasumik angerlarsimaffissaqaraniluunniit, tamattami ilisimavarput suliffimmi atugassarititaasut avatangiisillu pitsaasuuppata suliffik orniginarnerujussuusartoq.

Ilagiit pillugit inatsimmi 2013-mi allanngortinnerani akuersissutigineqarnikuuvoq atuagarsuarnik allattuisartut tassalu palasit oqaluffiit illutaanik toqusullu inaannik nakkutilliinerit ajornartorsiutitaqanngitsumik ingerlasoq oqaatigineqarluni. Tassami pappiaqqamut allaannarluni qanoq pissutsit allattuinnarneqarsinnaapput tassanilu oqaatigineqarpoq nakkutilliinerit ajornartorsiutitaqanngitsut.

Kisiannili piviusut qiviaraanni ilagiinni illutit sumiiffiit ilaanni imak aserfallassimatigisarput, allaat palasit illutoqarsui aserfallassimagaarmata najorneqarsinnaanatik. Ilaatigullu inatsimmiikkaluarpoq provstip illuutit isumannaatsumik aserfallaatsaalissagai oqaatigineqaraluartoq, tamannalu nammassineqarsinnaanngitsoq takusinnaasarpaput, tassami aningaasanik annerusumik malitseqartitsineq ajoratta aserfallatsaalinissamut aningaasanik inatsisiliormi.

Aamma iluoornerisooq paaserusupparput soorlu illoqarfinni nunaqarfinniluunniit ajoqit arlaqarsimappata taava ajoqip ataatsip aningaasarsiassaai agguarneqartartut, paasinarninngorlugu ajoqit marluusimappata taava aningaasarsiat ataatsip avinneqartarnersut.

Taamatut oqaaserluta ataatsimiititaliami suliarineqarnissaa innersuussutigaarput.